



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁL

## *Komunikadu Imprensa*

### *Tribunál Distrital Oe-Cusse*

*9 Dezembru 2013*

## **Tribunál kondena arguidu kazu omisídiu agravadu ho pena prizaun tinan 18**

Iha 6 Dezembru 2013, Tribunál Distrital Oe-Cusse, atraves husi Tribunál Díli kondena arguidu ba kazu omisídiu agravadu ho prizaun tinan 18. Kazu ne'e akontese iha 13 Janeiru 2013 iha Distritu Oe-Cusse.

Kazu ne'e partense ba jurisdisaun Tribunál Distrital Oe-Cusse, maibé tanba arguidu oras ne'e iha prizaun preventiva Becora no autor judisiáriu sira aktualmente iha Dili, nune'e leitura sentensa halao iha Tribunál Distrital Dili.

Antes ne'e, Ministériu Públiku akuza katak iha 13 Janeiru 2013, iha tuku 13:00 meudia, arguidu la'õ hamutuk ho vítima husi merkadu fila ba uma. Iha dalan klaran vítima husu atu sosa tabaku. Tanba ne'e arguidu hasai tabaku lulun hat no fó ba vítima maibé derepente vítima hakilar katak arguidu bok nia.

Iha alegasaun final Ministériu Públiku nian ne'ebé apresenta ba Tribunál Oe-Cusse iha 19 Novembru 2013, alega katak arguidu komete krime omisídiu hasoru vítima tanba deit vítima hakilar hasoru arguidu katak arguidu atu bok vítima.

Mesmu la prova katak arguidu halo violasaun seksual hasoru vítima, maibe Ministeriu Públiku diskonfia katak arguidu iha motivasaun aat ka intensaun atu estraga vítima. Tanba ne'e husu ba tribunál atu kondena arguidu ho pena ne'ebé ekuilibru ho arguidu nia hahalok.

Tribunál konklui prosesu ne'e bazeia ba deklarasaun arguidu katak nia mak rasta no lori obrigatóriu vítima ba ailaran hodi taa vítima iha kakorok, kanuruk no kotuk laran no rezulta vítima mate kedas iha fatin akontesimentu.

“JSMP rejista katak violénsia hasoru fetu kontinua aumenta husi loran ba loran. Fetu barak mak sofre violénsia doméstika, violasaun seksual, abuzu seksual, presaun psikolojiku, tratamentu aat no forma violénsia sira seluk too lakon sira nia vida tanba deit atu proteze no defende sira nia-an husi aktu krime kontra sira nia dignidade no

ne'e situasaun ne'ebé treste teb-tebes", dehan Direktór Ezekutivu JSMP, Luis de Oliveira Sampaio.

JSMP hanoin katak la iha razaun ne'ebé justifikavel ba arguidu se vítima hakilar hanesan ne'e deit, maibe arguidu bele pratika aktu omisídiu ne'ebé kruel (*sadis/kejam*) teb-tebes hasoru vítima.

JSMP hanoin katak antes arguidu oho vítima, iha razaun forte atu diskonfia katak, arguidu bele komete violasaun seksual ho vítima ka arguidu oho vítima tanba vítima la fo nia an ba arguidu estraga.

“Atu deskobre lolos krime ne'e nia motivasaun no intensaun arguidu nian, polisia no Ministeriu Públiku tuir lolos tenke lori vítima ba halo autopsia atu hetan faktu seluk ne'ebé asociadu ho krime ne'e, tanba la iha testemuña ida iha kazu ne'e, dehan Direktór Ezekutivu JSMP Luis de Oliveira Sampaio.

Kazu ne'e rejista ho número prosesu: 91/C.Ord//2013/TDO. Julgamentu ba leitura akordaun ne'e prezide husi juiz Dr. João Riberio (Juis Administradór Tribunál Distritál Oe-Cusse) Ministériu Públiku representa husi Dr. Mateus Nessi no arguidu hetan defeza husi Dr. Afonso Fatima Gomes (Estajiadu) husi Eskritóriu Defensória Públiku.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone:3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl